

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!

Parashah 26: Shemini (שמיני): Agste

Dit het gebeur dat op die agtste dag Moshe vir Aharon, sy seuns en die oudstes van Yisra'el geroep het en vir Aharon gesê het: "Wat vir jouself 'n bulkalf as sondoffer en 'n ram as brandoffer, altwee sonder gebrek en offer hulle voor יהוה." Lev. 9:1 en 2 – PWL¹

Torah: Lev. 9:1 tot 11:47.

Haftorah: 2 Sam. 6:1 tot 7:17.

Nuwe Verbond: Mark. 7:1 tot 23; Mark 9:1 tot 13; Hand. 5:1 tot 11; 10:1 tot 35; 2 Kor. 6:14 tot 7:1; Gal. 2:11 tot 16; 1 Pet. 1:14 tot 16.

Hierdie notas is aanvullend tot die vorige notas vir parashah 26 wat afgelaai kan word by: [Parashah26Notas14](#) of by [Parashah26Notas15](#).

To acquire knowledge, one must study. To acquire wisdom, one must observe – Anonymous.

Opportunity may knock only once, but temptation leans on the doorbell – Anonymous.

Whenever evil wins, it is by moral failure of those who compromise basic principles. History is replete with examples of entire nations weakened by compromise and moral failure – Anonymous.

The man who keeps busy helping the man below him, won't have time to be jealous of the man above him – Henrietta Mears.

Worry does not empty tomorrow of its sorrow. It empties today of its strength – Corrie ten Boom

¹ Alle teksverwysings is geneem uit PWL Vertaling, behalwe waar anders vermeld. Die PWL Vertaling (Pad van Waarheid tot die Lewe) kan gratis afgelaai word by www.padwlewe.ch, maar is ook nou in gedrukte formaat beskikbaar. Om 'n kopie van die Bybel te bekom kan Gerrie Coetzee per e-pos by padwlewe@yahoo.com of telefonies by 074 361 2134 gekontak word.

Torah Bespreking

Vreemde Vuur: Wie...? Ek...?? Nooit Nie...!??.

Die seuns van Aharon, Nadav en Avihu, het elkeen sy vuurpan gevat, vuur daarin gegooi, reukwerk daarop gesit en vreemde vuur voor die Teenwoordigheid van יהוה geoffer, wat Hy hulle nie beveel het nie. Vuur het vanuit die Teenwoordigheid van יהוה uitgegaan en hulle verteer en hulle het gesterf voor die Teenwoordigheid van יהוה. Moshe sê vir Aharon: "Dit is hierdie ding wat יהוה van gepraat het deur te sê: 'Deur dié wat naby My kom, sal Ek geëer word as Afgesonderd en voor die die hele volk sal Ek verhoog en vereër word.'" Aharon het stilgebly. Lev.10:1 tot 3.

Dit is noodsaaklik dat elkeen wat getuig van vertrouwe (geloof) in die God van Abraham, Isak en Jakob, en in Yeshua as die gekruisigde en opgestane Messias, moet nadink oor Nadab en Abihu se optrede wat tot hulle skielike dood gelei het!! Daar word egter nie graag gepraat oor die waarskuwing wat in hierdie Skrifgedeelte vervat is nie, want dit pas nie in by moderne teologiese siening en 'n gemaksugtige geloofsleefwyse nie.

Sommige sien die Nadab-Abihu-gebeure egter nie meer as van toepassing nie vanwêe die genade van die nuwe verbond. Daar word egter vergeet dat al hierdie dinge wat met Israel gebeur het, opgeskryf is om as voorbeeld en waarskuwing aan ons te dien.

Al hierdie dinge het gebeur as voorbeeld vir ons en is opgeskryf as 'n waarskuwing aan ons, want die einde van die wêreld het by ons aangekom. 1 Kor. 10:11.

Elkeen van ons behoort dus te vra: Is ek nie dalk ook soos Nadab en Abihu skuldig nie? Is ek seker dat ek as koninklike priester volgens die orde van Melgisédek (1 Pet. 2:9) nie dalk ook 'vreemde vuur' in die Teenwoordigheid van YHVH bring nie? Reageer jy hierop ook soos wat ek aanvanklik op hierdie vrae gereageer het met 'n onmiddelike: Wie...? Ek...? Nooit nie...!!

Die feit dat die Skrifte melding maak van die dood van Nadab en Abihu, pas nadat hulle afgesonder (geheilig) was en met hulle dienswerk in die tabernakel begin het, behoort ons elkeen tot 'n selfondersoekende stilstand te ruk! Beide was opgelei en ingelig oor wat YHVH van hulle as priesters vereis het. Hulle het 'n sewe dae wydingseremonie ondergaan en was deur YHVH as afgesonder verklaar en as gereed vir dienswerk in die Tabernakel. Nogtans het hulle strydig met die onderrig en instruksies van YHVH opgetree. Nadab en Abihu het YHVH se onderrig en instruksies verontagsaam, of miskien gewysig in die oortuiging dat dit dieselfde eindresultaat, asook YHVH se goedkeuring sal hê! Hulle het in alle waarskynlikheid hulle dienswerk met goeie bedoelings uitgevoer! Is ons nie geneig om dieselfde te doen nie?

Was dit doelbewuste rebellie en doelbewuste sonde teen YHVH of het hulle met goeie bedoelings opgetree? Hulle was immers deur YHVH self afgesonder as priesters en uitverkies uit die res van Israel. Beide het ook saam met Moses en die oudstes van Israel op uitnodiging van YHVH op die berg Sinai geklim om in YHVH se teenwoordigheid te wees (Ex. 24:1). Hulle het beslis die guns van YHVH ervaar!! Het dit nie vir hulle dan 'n mate van 'vryheid' gegee om na eie goeddinke op te tree nie? Het hulle nie net in 'n oomblik van swakheid dalk vergeet wat is rein en onrein nie? Was 'n gebrek aan praktiese ondervinding nie dalk die probleem nie?

Hierdie is 'n baie belangrike vrae, want so maklik kan ons onself in hierdie situasie bevind. As 'n uitverkore geslag en as 'n koninklike priesterdom en as 'n afgesonderde volk (1 Pet.

2:9) is ons nie verhewe bo 'n Nadab en Abihu nie!! Indien ons eerlik is, dan kan ons in vele opsigte met beide van hulle identifiseer!

Nou kan ons ook vra: Was YHVH se oordeel nie te kras nie? Beide Nadab en Abihu het tog pligsgetrou die priesterlike wydingseremonie van sewe dae ondergaan! Hulle was tog die seuns van Aäron – wel jonk en onervare!! Dan was dit ook hulle eerste oortreding!! Wat van vergifnis en genade?? Was hulle optrede dalk nie bloot weens hulle ywer nie? Dit is tog sekerlik verstaanbaar en verskoonbaar!? Wat van die groter verantwoordelikheid en verhoogde 'werkslading' wat toe op die skouers van die oorblywende twee priesters, Eleasar en Itamar, gerus het? Wat van die priesterlike nageslag wat uit die seuns van Aäron moes voortkom en waarvan die kanse nou met 50% verminder het? Het YHVH dan nie hieraan gedink of dit in aanmerking gebring nie? Was Nadab en Abihu se oortreding werklik so ernstig dat dit die dood verdien het? Hulle het tog tot en met hulle sterwe geglo in die God van Abraham, Isak en Jakob! Hulle het nie YHVH verwerp nie!

Al bogenoemde vrae en redenasies is sekerlik uit 'n menslike oogpunt sinvol!? **MAAR** ons het te doen met YHVH Skepper-God wat nie 'n mens is nie, maar 'n waarmaker van Sy Woord is en wat nooit verander nie (Num. 23:19; Mal. 3:6; Heb. 13:8). Volgens Sy Woord het YHVH bepaal wat rein en onrein is en wat afgesonder (heilig) en onafgesonder (onheilig) is. As priesters moet ons hierdie onderskeid kan maak (Lev. 10:10) en ander so ook leer (Eseg. 24:33). YHVH se Torah is Sy onderrig en instruksies in reinheid, heiligmaking en geregtigheid en ons moet dit nougeset nakom!

Verder moet ons besef dat slegs dit wat rein en afgesonder is, in YHVH se Teenwoordigheid mag kom. Dit wat rein is, mag nie met die onreine vermeng word en dan as offer (aanbidding, dienswerk) aan YHVH gebring word nie. Net so mag ons nie dit wat afgesonder is met dit wat nie afgesonder is, vermeng nie, want die onreine en dit wat nie afgesonder is nie, is vreemde vuur. Nadab en Abihu het vreemde vuur in die Teenwoordigheid van YHVH gebring en dit het veroorsaak dat daar vuur van die aangesig van YHVH uitgegaan het en hulle verteer het.

Die seuns van Aharon, Nadav en Avihu, het elkeen sy vuurpan gevat, vuur daarin gegooi, reukwerk daarop gesit en vreemde vuur voor die Teenwoordigheid van יהוה geoffer, wat Hy hulle nie beveel het nie. Lev. 10:2

Ons kan bespiegel oor presies wat die vreemde vuur was. Byvoorbeeld: Het Nadab en Abihu dalk wyn of sterk drank gedrink en toe in die tent van samekoms ingegaan (Lev. 10:9)? Het hulle die nodigheid van die dra van die priesterlike klere in die teenwoordigheid van YHVH dalk veronagsaam. Miskien was die gloeiende kole in hulle vuurpanne vanaf 'n ander bron as van die brandofferaltaar? Wou hulle nie miskien op hulle eie skeppende wyse uitdrukking aan hul liefde en ywer vir YHVH gee nie?

Daar is vele ander moontlikhede wat ook oorweeg kan word. Die feit bly egter dat beide op 'n wyse gehandel het wat strydig met YHVH se onderrig en instruksies was. Hulle het YHVH se Torah, Sy onderrig en instruksies, oortree! Nadab en Abihu het op 'n wyse gehandel wat volgens hul eie standaard aanvaarbaar en goed gelyk het, maar hulle het egter nie aan YHVH se geregtigheid voldoen nie (Matt. 6:33).

Dit is duidelik dat onkunde, of enige ander rede, nie as versagtende omstandighede in die guns van Nabab en Abihu aanvaar sou word nie, want YHVH sal nie van Sy onderrig en instruksies afwyk of dit wysig nie. Dit is die les wat ons uit hierdie gebeure ter harte moet neem!! YHVH, ons Vader, het sy 'huisreëls' opgestel. Dit wat op aanbidding en dienswerk in die Tabernakel van toepassing was, is steeds op ons as die tempel van God van toepassing (1

Kor. 3:16 en 1 Kor. 6:19). Dieselfde beginsels geld steeds!! Onthou: Ons eie geregtigheid, naamlik ons eie pogings, beslissings en oordele, is niks meer as ‘n besoedelde kleed wat ons in YHVH se Teenwoordigheid bring (Jes. 64:6).

As koninklike priesterdom wat deur die kosbare bloed van Yeshua duur gekoop en afgesonder is, moet ons dus baie versigtig wees om nie met groot ywer of menslike wysheid ons eie geregtigheid op te rig nie. Ons moet YHVH se geregtigheid, soos dit deur Yeshua Messias openbaar gemaak is, soek, ken en daarvolgens lewe. Indien ons goed luister na die stem van YHVH ons God, om sorgvuldig al Sy gebooe wat Hy ons beveel het te onderhou (Deut. 28:1), dan sal die lot van Nadab en Abihu ons nie tref nie.

Laat ons die woorde van Moses aan Aäron ook op ons van toepassing maak en dit nooit te vergeet nie:

“Dit is hierdie ding wat יהוה van gepraat het deur te sê: ‘Deur dié wat naby My kom, sal Ek geëer word as Afgesonderd en voor die die hele volk sal Ek verhoog en vereer word.’” Lev. 10:3.

Ons kan slegs in YHVH se Teenwoordigheid staan wanneer ons Hom ken, verhoog en vereer as die Afgesonderde volgens Sy vereiste en standaard. Ons eie en goedbedoelde pogings is vreemde vuur! Indien ons dit wat onrein en nie afgesonder is nie in Sy teenwoordigheid bring, sal YHVH se vuur ons verteer!

Dit is beter om bereidwillig te wees dat YHVH se vuur ons daaglik reinig as wat Sy vuur ons eendag totaal gaan verteer. Wanneer ons toelaat dat Hy die Silwersmit is wat ons smelt sodat alle onsuiverhede uit ons lewe verwyder word (Ps. 66:10), dan sal ons staande bly die dag as Hy verskyn. Dan kan ons in Sy Teenwoordigheid kom, want dan is ons ‘n lewende, afgesonderde en welgevallige offer aan God (Rom. 12:1). Dan is ons rein en afgesonder en sal ons met dit wat rein en afgesonder is vir YHVH, ons Vader, vereer en verhoog.

Nadab en Abihu dien as waarskuwing dat die een wie meen dat hy staan, moet oppas dat hy nie val nie (1 Kor. 10:12). Dit is ‘n herinnering dat dit wat ons by wyse van ons alledaagse lewe aan YHVH offer volgens Sy voorskrifte moet wees. Sy wette, voorskrifte en insettinge kan nie **herskryf** word om by ons aan te pas nie.

Niemand kan dit bekostig om te vergeet dat YHVH-God ook ‘n verterende vuur is (Deut. 4:24; Heb. 12:29).

“maar wie kan die dag van Sy koms verdra? Wie kan staande bly as Hy verskyn? Want Hy is soos die suiweraar se vuur en soos die seep van die wasser. Mal 3:2.

Laat ons dus in hierdie dae onthou dat alles wat tevore geskrywe is (1 Kor. 10:1 tot 11), is tot ons lering tevore geskrywe sodat ons deur volhardende geduld en vertroosting vanuit die Skrifte ‘n versekerde verwagting kan hê (Rom. 15:4).

Wat is hierdie versekerde verwagting? Ons het die sekerheid dat deur die guns in Yeshua, en deur die werking van die Afgesonderde Gees, sal ons YHVH ken as die Afgesonderde en sal ons as afgesonderd en rein in Sy Teenwoordig kan staan met die vuur wat YHVH self aan die brand gestee het. Die lot van Nadab en Abihu hoef nie ons lot te wees nie!!

Ons het ook die versekering dat wanneer ons YHVH volgens Sy onderrig en instruksies vereer en verhoog as die Afgesonderde een, dan sal Sy Gemanifesteerde Teenwoordigheid aan ons verskyn (Lev. 9:6 en 23).

Laat ons reaksie ten opsigte van vreemde vuur van: ‘Wie...? Ek...? Nooit nie...!’ verander na die gesindheid van die tollenaar wat kophangend op sy bors geslaan het terwyl hy uitroep: ‘O God, wees my, sondaar, genadig!!’ (Luk. 18:13).

Laat ons alle vreemde vure blus met die waarheid van ‘n gehoorsame lewe as geregverdigdes in Yeshua Messias!! Laat ons YHVH, ons God en Vader, vereer en aanbid volgens Sy voorskrifte en nie op wyses wat vir ons aanvaarbaar is en goed bedoel is nie!!

Bepeins of Bespreek

1. Die mens se goeie bedoelings kan nooit ‘n plaasvervanger vir gehoorsaamheid aan YHVH wees nie. Dit is die les wat Saul byvoorbeeld geleer het (1 Sam. 15:1 tot 26). Kan jy ander voorbeelde uit die Skrifte noem? Wat van die aanbidding van die goue kalf (Ex. 32:1 tot 5)? Was Aäron se bedoeling dan nie opreg nie? Selfs Kain en Abel is ‘n voorbeeld (Gen. 4:1 tot 12). Het Kain nie met goeie bedoelings gaan offer nie? Was dit doelbewuste rebellie van sy kant gewees? Selfs koning Dawid moes leer dat die verbondsark slegs volgens YHVH se voorskrifte terug gebring kon word (1 Kronieke hoofstukke 3, 13 en 15). Die les: YHVH, ons Vader, vereis gehoorsaamheid en nie goeie bedoelings nie!! Ongehoorsaamheid aan YHVH se onderrig en instruksies is vreemde vuur! *There is only one way and that is YHVH's way!*
2. Hoe dikwels probeer ons YHVH as ons God en Vader vereer en aanbid op mensgemaakte wyses! Ons probeer YHVH se Gemanifesteerde Teenwoordigheid volgens ons eie menslike pogings terugbring. Ons bedoelings mag opreg wees, maar as dit nie volgens YHVH se vereiste voorskrifte is nie, dan is dit vreemde vuur en kan dit geestelike dood tot gevolg hê!
 - Kersfees, *Easter*, en Sondagaanbidding is ondermeer vreemde vuur.
 - Is die siening dat Rabbynse Judaïsme ons as gelowiges in Yeshua se leermeester is, nie ook vreemde vuur nie?
 - Wat van diegene wat sekere Skrifte van die nuwe verbond bevraagteken en selfs verwerp? Is dit nie vreemde vuur nie?
3. Deesdae word die ware kalender van YHVH wyd gedebateer en is daar verskillende groepe wat elk ‘n kalender volg waarvan hulle oortuig is dat dit YHVH se kalender is! Beskou YHVH dit as vreemde vuur indien ons nie Sy kalender weens gebrek aan ons kennis volg nie, maar ons bly soekend na die ware kalender? Die vraag is dus: Is onkunde ‘n verskoning en rede dat YHVH dit nie as vreemde vuur sal reken nie? In die verband moet ons Dawid se begeerte om die verbondsark na Israel terug te bring, onthou, naamlik:

Dawid wou die verbondsark na twintig jaar terugbring om dit weer in die midde van die volk te plaas. Hy wou weer die Gemanifesteerde Teenwoordigheid van YHVH terugbring na Israel. Hulle het die ark toe op ‘n nuwe wa geplaas en Dawid en die hele Israel het uitbundig voor die ark van God gedans, terwyl hulle deur musiekinstrumente begelei was (1 Kron. 3:6 tot 8). Toe hulle by die dorsvloer van Nakon kom, het Ussa die ark met sy hand gestut, want die osse het gestruikel. YHVH se toorn het egter toe ontvlam en Ussa het daar langs die wa gesterf (1 Kron. 13:9 en 10). Het Ussa gesterf omrede Dawid besig was om vreemde vuur in YHVH se teenwoordigheid te bring?

Dawid was erg ontsteld en het vir God bevrees (bang) geword en gevra: *Hoe kan ek die ark van God na my toe bring?* (1 Kron. 13:12). **Daardie dag het Dawid besef dat sy goeie bedoelings nie goed genoeg was nie!!** Hy moes gaan uitvind wat YHVH se vereistes was om die ark terug te bring. Hy moes dit volgens God se onderrig en instruksies doen (1 Kron. 15) en nie volgens die van mense nie. Alleenlik toe is die verbondsark suksesvol teruggebring en was die Gemanifesteerde Teenwoordigheid van YHVH weer in hulle midde gewees.

4. Ons leef in tye waar elkeen ernstige selfondersoek moet doen of ons nie ook soos Nadab en Abihu besig is om aan YHVH vreemde vuur te bring nie! Het ons al soos 'n Dawid bevrees vir YHVH geword omrede ons besef ons kan moontlik vreemde vuur deur ons optrede of geloofsoortuiging vir YHVH aanbied? Laat ons alle vreemde vure blus met die waarheid van 'n gehoorsame lewe as geregverdigdes in Yeshua Messias!!

-O-O-O-O-O-O-O-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.

Johan.

Epos: kontak@nuwelielied.info

Webwerf: <http://www.nuwelielied.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.